

ROBERTS, THOMAS ('Scorpion'; 1816 - 1887), gweinidog gyda'r Annibynwyr

Enw: Thomas Roberts
Ffugenw: Scorpion
Dyddiad geni: 1816
Dyddiad marw: 1887
Rhiant: Harri Roberts
Rhyw: Gwryw
Galwedigaeth: gweinidog gyda'r Annibynwyr
Maes gweithgaredd: Crefydd
Awdur: Richard Griffith Owen

Ganwyd yn Ninbych, bedyddiwyd 25 Awst 1816, mab Harri Roberts, g r o hunan-ddiwylliant nodedig a dreuliodd gryn 20 mlynedd yn y fyddin. Prin fu manteision addysg 'Scorpion' ar y dechrau; bu mewn ysgol a gedwid gan '[Caledfryn](#)' (William Williams) yng nghapel y Methodistiaid Calfinaidd, ond casglwn mai ei dad fu ei brif hyfforddwr gan iddo golli ei fam ac yntau'n ddim ond 12 oed. Bu am ysbaid yn brentis o of.

Yn 1837 daeth '[Gwilym Hiraethog](#)' (William Rees) yn weinidog eglwys Lôn Swan, Dinbych, a chanfu yn 'Scorpion' gymwysterau ar gyfer y weinidogaeth, a'r haf hwnnw dechreuodd 'Scorpion' bregethu. Aeth yn 1839 i'w addysgu ar gyfer coleg at y Parch. D. W. Jones, Holywell. Ym mis Rhagfyr 1841, yn niffyg lle iddo yng Ngholeg Aberhonddu, aeth i Lanuwchllyn i 'ysgol ddarpariadol' [Michael Jones](#) yn un o ddisgyblion cyntaf yr ysgol honno a symudwyd i'r Bala Tachwedd 1842 ac a adnabwyd yn ddiweddarach fel athrofa'r gogledd. Tua'r Nadolig 1842 troes ei wyneb tuag Aberhonddu, a cherddodd yno'r holl ffordd gefn gaeaf - awgrym o'r dyfalwch a'r dycnwch a'i nodwedddai gydol ei oes. Profodd ei hun yn weithiwr caled yn y coleg a daeth yn fuan yn amlwg fel llenor ar bwys ei ysgrifau i'r *Dysgedydd* a'r *Haul* (a olygid gan '[Brutus](#),' a roes iddo bob cefnogaeth i ddilorni crach bregethwyr a diaconiaid unbenaethol a elwid gan [Brutus](#) yn 'Jacks' a 'Lords'). Dywedir iddo yn y cyfnod hwn ogwyddo i gyfeiriad ymuno â'r Eglwys, a phosibl fod a wnelo'r gyfathrach â '[Brutus](#)' â hynny. Dyma'r pryd hefyd y dechreuodd ddefnyddio'r ffugenw 'Scorpion.'

Yn 1846 derbyniodd alwad i fod yn olynydd i [Michael Jones](#) yn eglwys yr 'Hen Gapel,' Llanuwchllyn. Cyfnod toreithiog oedd y cyfnod a dreuliodd yno; cadwai yno ysgol ddyddiol yn lle ysgol y [Dr. Williams](#) a symudasid i'r Bala gyda [Michael Jones](#), ac âi cyn belled â Rhydymain i gynnal dosbarthiadau llenyddol. Yn Nhachwedd 1848 creodd gyffro mawr drwy'r wlad ben bwy gilydd ag erthygl o'i eiddo yn *Y Dysgedydd* dan y pennawd, 'Ocheneidiau'r Weinidogaeth.' Ymosodwyd yn chwyrn arno ac amddiffynnwyd ef, os yr un, yn fwy chwyrn, gan ei hen gyd-fyfyriwr, '[Ieuan Gwynedd](#).' Fel eraill o arweinwyr Annibyniaeth yn ei gyfnod, yr oedd 'Scorpion' yn 'political dissenter' hefyd. Bu'n amlwg yn y frwydr yn Llanuwchllyn yn erbyn y dreth Eglwys. Yn 1856 symudodd i Drelawnyd (Newmarket) yn Sir y Flint, ac yn 1858 i Lanrwst.

Ymdeolodd yn 1881 a bu farw 12 Mehefin 1887, a chladdwyd ef ym mynwent y Santes Fair, Llanrwst.

Cyhoeddodd *Esboniad Cyflawn ar y Testament Newydd, Testament Daearyddol, Gwaith Barddonol Ieuan Gwynedd, Cofiant H. Pugh, Mostyn* (cydolygydd), *Cofiant Caledfryn*; a dechreuodd ar gofiant i '[Gwilym Hiraethog](#),' a gwplawyd gan [David Roberts](#) (1818 - 1897).

Awdur

Y Parchedig Richard Griffith Owen, (1890 - 1973)

Ffynonellau

R. T. Jenkins, *Hanes Cynulleidfa Hen Gapel Llanuwchllyn* (1937), 179-85

E. T. Davies, [Marwolaeth a Chladdedigaeath y Parch T. Roberts \(Scorpion\), Llanrwst](#), *Y Dysgedydd*, Gorphenaf 1886, t.280

W. R. Owen, [Scorpion](#), *Y Dysgedydd*, Medi 1889, 343-348

W. R. Owen, [Scorpion II](#), *Y Dysgedydd*, Hydref 1889, 385-391

W. R. Owen, [Scorpion III](#), *Y Dysgedydd*, Ionawr 1890, 19-25

W. R. Owen, [Scorpion](#), *Y Dysgedydd*, Chwefror 1895, 55-60

W. R. Owen, [Scorpion IV](#), *Y Dysgedydd*, Mai 1895, 176-181

W. R. Owen, [Scorpion V](#), *Y Dysgedydd*, Gorphenaf 1895, 266-270

W. R. Owen, [Scorpion VI](#), *Y Dysgedydd*, Medi 1895, 337-341

Llawysgrifau Scorpion yng Ngholeg Prifysgol Gogledd Cymru, Bangor, 987, 1-25

Album Aberhonddu ... o'r flwyddyn 1755 hyd 1880 (1898), 140

Darllen Pellach

Erthygl Wicipedia: [Thomas Roberts \(Scorpion\)](#)

Gweithiau

Thomas Roberts, David Roberts, [Cofiant y Parch. W. Rees, D.D. \(Gwilym Hiraethog\)](#) (Dolgellau 1893)

O. Gethin Jones, William John Roberts, Thomas Roberts, E. Humphreys (goln.), [Gweithiau Gethin sef casgliad o holl weithiau barddonol a llenyddol](#) (Llanrwst 1884)

Dolenni Ychwanegol

Wikidata: [Q28361417](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

